



F. v. f

HARRIS, W.

<sup>18</sup>

De morbis acutis infantum

pt. 2 only

1715

27680/A/2









26 C.C. (9)

19863

*Commentarius Medicus*

DE

# APHTHIS NOSTRATIBUS,

Seu

*Thrush*

Belgarum **Sprouw.**

AUTHORE  
VINCENTIO KETELAER  
MED. DOCT.



AMSTELODAMI,

Apud JOH. FRED. BERNARD.

1715.

V. 07  
2/08







*Nobilissimo, Amplissimo,*

*Prudentissimoque*

# SENATUI ZIRIZÆANO S.



Agnum, Patres conscrip-  
ti, miraculum homo est;  
sive partem hujus intuemur  
inferiorem, pusillam cor-  
poris machinam, quæ sum-  
mo artificio & compendio vastissimam  
mundi molem exhibet, & qua (ut



# DEDICATIO.

*Senecæ* verbis utar ) nihil neque majus neque ornatius rerum natura genuit , sive majestatem spectamus animæ , quæ naturæ & ortus sui dignitate omnem materiam longè prætervecta , velut princeps & rerum arbitra præfulget ; sed hujus admirationi nihil deest , si utriusque à se quàm remotissimè naturâ dissidentis amicam , familiarem ac individuum unionem atque comitatum contemplamur , imprimis cùm neutrum alterius ope vel sit , vel vivat , sed suo utrumque insito peculio se protegat. Sed quantis parasangis reliqua omnia splendor hominis à tergo relinquit , tanto hujus investigatio difficilior & cognitio desperatior. Ab omni sæculorum memoriâ qui sublimioribus curis eminere studuerunt , hunc potissimum scrutati sunt , vel ut nuda speculatione mentem pascere , vel in remedium humanarum calamitatum veluti deorum filii quippiam conferrent. Neutrorum conatus improbandi : Quippe per quos pomæria hu-



## DEDICATIO.

humanæ reipublicæ & promoventur & excoluntur. Horum exemplo, Patres conscripti, ut meæ erga vos observantiæ, atque hujus breviusculi otii mei ratio constaret, de Aphthis Nostratibus commentariolum edidi vobisque inscripsi ac dicavi. Quidni vobis? Inter quos si illæ non primùm innotuere mihi, saltem longo rerum usu penitiùs penetratæ propiùs conspiciendas se præbuerunt. Plurima insuper vestra in me merita suo sibi jure nullum non officiorum genus exigunt: Eâ animorum propensione, humanitate, ac beneficentiâ me prosecuti estis, ut in patriâ urbe non alia quis verecundis votis sibi promiserit, quam in me externum cumulatissimè contulistis. Quas ob causas ne impudentiæ postuler, à qualicunque pro re nata gratitudine sperandum esse mihi persuadeo. Vobis si hæc animi atque obsequii mei pignora haud ingrata intelligam, immane quantum alacritatis accedet ad perpolienda majorum vigiliarum opera,

a 3

vestrâ-

# DEDICATIO.

vestrâque amplitudine digniora. Va-  
lete. Scribebam Zzææ exeunte Au-  
gusto cło. Ioc. Lxix.





IN

*Eruditissimi Viri*

VINCENTII KETELARII,

*Medici, & Gymnasiarchæ*

ZIRIZÆANI,

Commentarium

De Aphthis Nostratibus.

**M***Ajorum veneranda ævi stat gloria scriptis,  
Queis medicam dubius consulat æger  
opem.*

*Sed malè multa tamen, non intellecta leguntur,  
Sæpius & priscâ non redit arte salus.*

*Quæque suos patitur manes mutabilis ætas,  
Quæque sui quæritur semina terra mali.*

*Antiquos nostræ latuere Machaonas Aphthæ,  
Et latuit medicas, his adhibere manus.*

*Non veterum auxilio, nec defensoribus istis  
Corpus eget; melius postulat artis opus.*

*Quum variant morbi, variantur temporis artes;  
Ut nova cura malis convenienter eat.*

*Hanc docet, & monstrat Ketelaria penna salutem,*

*Judiciumque suum, quo tueatur, habet.  
Tempora temporibus discernit, nomina rebus,  
Signaque cum causis ingeniosa notat.  
Ex merito tibi surgit honor, Doctissime Rector,  
Et calami famam nobilioris habes.  
Vocis iter claudunt præstrietis faucibus Aphthæ,  
Sæpe immaturæ sunt quoque causa necis:  
Sed tibi dant vitam; dum te fecere disertum;  
Et patet in laudes area lata tuas.*

ROCHUS HOFFERUS.



COMMENTARIUS  
DE  
APHTHIS  
NOSTRATIBUS,

*Seu*

Belgarum *Sprouw.*



Nde malo huic, quod septentri-  
onalibus hisce plagis tam frequens  
atque anceps est, Aphtarum no-  
men sit inditum, meritò miramur.  
Nam quæ à priscis Medicinæ con-  
ditoribus nobis Aphthæ describuntur, adeo  
à nostris diversæ sunt, ut toto cœlo distent.  
Hippocrates Aphorismo vigesimo quarto  
Sectionis tertiæ, multisque aliis locis, inter  
morbos primæ infantium ætatis proprios eas  
numerat, & superficiaria oris ulcera, mali-  
gna & serpentia, ignea quadam caliditate  
prædita vocat, quæ nuper natis infantibus,  
tenellisque accidunt. Ad ea Galenus, in  
puerulis, ait, recens in lucem editis Aph-  
thas fieri. Sic autem vocant ulcerationes oris

superficiarias , præ mollitie maximè instrumentorum exortas , quæ neque contactum, neque lactis qualitatem ferre possunt, quod non parum feri in se continet. Est autem id naturâ abstergendi facultate præditum, adeo ut mirum non sit, si in mollioribus corporibus quasdam in superficie ulcerationes efficiat : Et alibi faciliè eas placari inquit, si infantis os, cibis & potibus prorsus insuetum, modicè astringas. Nec oris tantum, sed & aliarum partium fervida & superficiaria ulcera Aphthas vocarunt. Unde Hippocrati ἀφθᾶν τὰ αἰδοῖα dicuntur. Sic illi, & ex illis omnis Medicorum Natio deinceps uno fere ore locuta est. Qui acrimoniam & corruptionem nescio quam assumptorum, è ventriculo exhalantium aut è capite in subiectum os procumbentium, causam earum statuere, & repellentium usu tractavere. Nostrates verò Aphthæ ab his omnibus procul sint, & naturâ, causis, ipsâque curandi methodo differant, in progressu patebit. Quod praxim auspicantibus non leviter semper imposuit, quos nomina & Veterum ductum secutos in exitiales errores sæpe lapsos fuisse necesse est. Non utique dubitem, si animi sensa candidè aperire licet, asserere, id vitii, quod vulgari notione Aphthas appellamus, iis qui Medicinam nobis tradidere, vel plane fuisse incognitum, vel alterius apud illos quàm hîc indolis;



indolis, ut mirum non sit, nulla aut obscura ejus vestigia monumentis eorum contineri. Quid enim? si hodie Gallia, Italia, Hispania & calidiores regiones id adeo ignorent ut ne fando quidem de eo quicquam inaudivisse videantur, saltem ex Practicis eorum nemo, ut nobis conspicitur, prælibaverit aut attigerit; quid de Antiquis existimabimus, qui eodem aut ferventiori cœlo usi sunt? Fateor quidem Hipocratem in calce Prognosticorum hæc de se prædicare: Non esse quod à quocquam nomen alicujus morbi desideretur, quod iis libris descriptum non sit: Quippe signa ibi tradita vera esse & in Lybia, & in Delo & in Scythia, id est, regione calidissima, temperata, frigidissima. Ubi non tam Græciæ quam universi mundi praxim ob oculos posuisse videtur, & eum rerum usum affecutus, ut omnes humani corporis affectiones viderit atque indicarit. Quamquam tanto viro, quem semper veneratus sum, nihil derogatum velim, affirmare tamen id ausim, si tantâ frequentiâ, tantoque periculo, ut nobis, ita antiquis Aphthæ unquam visæ fuissent, non tam oscitanter, negligerterque posteris eas exposuissent: Quippe qui minimos ac tutissimos quosque affectus eâ curâ, eâque ambitione profecuti sint. Hac quoque causa nihil iis dignum à quopiam hætenus editum est; quod antiquos compilando ingentia volumina quisque

que malit condere , aut etiam mira sectari , quàm endemia & patria vitia proprio studio eruere. Sed de nomine eo minùs ligitandum est , quod majorum potissimum reverentia videtur receptum , ne quid usquam locorum aut gentium foret quod priscis illis patribus inobservatum videretur.

Aphthas igitur , ut Nobis occurrunt , hoc modo fusiùs & rudiùs describo: Pustulæ sunt albicantes summis ac internis oris & interdum vicinis respirationis ac deglutitionis partibus insidentes plerumque per lentam ac imperfectam crisin febribus supervenientes , borealibus his tractibus familiares. In tuberculorum & pustularum sensum redigendas esse , non in ulcerum , fides oculorum evincit. Quid quæso , istis cum ulcere? Non hîc solutio continui , non imminuta , sed aucta magnitudo est. Pariter non exedendo escharam seu crustam tenellis partibus inducunt ; sed vel maturæ frustulatim decidunt , vel interiora repetendo non manifestiora sui vestigia , quàm si nunquam fuissent , in ore relinquunt. Eas quoque semper candescere , aut subalbicare & ad cineritium colorem vergere , imprimis si funestæ sunt , nihilo minus liquet. Ut rubræ & atræ pro humoris differentia speculantium potiùs figmenta sint quàm usu invenientur. Saltem dum meliora doceamur eas negamus. Non enim veisimile est , ut in rebus sibi adeo vicinis & cognatis fors tantum polleat ,



polleat, cùm albæ plus millies nobis oblatae ſint, ut rubrarum, nigrarumve ne umbræ quidem unquam apparuerint. Superficiariæ hæ puſtulæ candentibus apiculis orbiculatis utrimque ab uvula frequentiffimè incipiunt & inde per devexiores palati partes progreſſæ, illis finibus aliquando continentur: Interdum ſi graviores ſint, toto ore ſparguntur: Linguam, gingivam, atque ipſa labia, quæ ori intus obtenduntur, occupant. Sæpe nec his limitibus ſubiſtunt ſed pomæria proferunt ad imas fauces, gulam, œſophagum & quæ his continua copioſius ſero ſolent prolui. Hujus rei non levia nec pauca indicia ſunt: Nam ut ea præteream quæ à deglutiendi & ſpiritum ducendi difficultate petuntur, inſtar omnium documento eſt, Aphthas, quando jam maturuerunt & excernuntur, tantâ copiâ aliquos dies & per os & per alvum nonnunquam rejici, ut aliquot pelves vel matulæ congeſtas eas vix capiant.

Non inficias eo tenacem & glutinoſum mucum, qui individuus earum comes eſt, videri poſſe illas augere: tamen quocunque modo res expenditur, tantum Aphtharum ſemper relinquitur, ut nec os, nec quicquid eſt vicinarum partium tantum earum vim capiat. Ut non immerito videri poſſim ſtupore quodam in eam opinionem raptus, tantis Aphthis conſpectis, ipſum ventriculum & tenuia inteſtina

stina interiùs tota iis obfessa fuisse. Sed de hac re nostratium practicorum iudicium esto: Diffimulare mentem fas non erat.

De causis Aphtharum & quomodo generantur major difficultas est, & quia rei caput, hîc paulo diutiùs & pressius morandum. Ante omnia non temerè quidem videor mihi persuasisse, hunc affectum, qui omni ætati & sexui communis est, eodem semper modo oriri & à causis pendere, quæ magnitudine atque acrimonia, seu quis malit malignitate quidem, nûnquam autem naturâ diffideant. Ut audiendi non sint qui alias in nuper natis & infantibus, alias in adultis ponunt. Quippe puellorum Aphthas à lacte nutricis ferofiori aut acriori, molles & teneras oris partes erodente ac exedente nasci, aut aliâ quâdam causâ externâ oppido quàm ridiculum est. Omnis accimonia seu assumptorum, seu catharri è capite in subjectum os delapsi, seu è ventriculo exhalans non excitabit, sed ut astringentia, natas Aphthas abolebit. Si oculis & observationibus suis practici mallent credere, quàm præjudiciis quæ temerè ab antiquis haurîre, fateri cogerentur, nihil esse, quod generationem & Aphtharum maturationem plus remoretur quàm earum rerum usum quas Aphtharum causas statuunt. Quotidie videre est si oris Aphthis prolapsus feri in fauces aut alias interiores partes superveniat, quàm statim



tim evanescant ac malo omine discedant. Sed non tam aliorum placita laceßere quam propria firmare ab instituti ratione monemur.

Omnes, quotquot sunt, Aphthas per crisis gigni, plerumque imperfectam & lentam; & unam ac solam causam agnoscere empyreuma, quod vario fonte in vasis natum à natura in dicta loca eliditur, ex animi sententia ut demonstretur, omnem hinc operam dabimus. Id haud difficulter persuadebitur, si illa notione & ratione Aphthæ spectentur, qua continuis & ardentibus febribus viridi constantique ætate superveniunt: Ibi genium suum imprimis produnt: Ibi earum ortum & eruptionem symptomata perturbationis criticæ manifestissimè ante eunt, alias seviore, alias mitiora pro causæ antecedentis & materiæ in vasis morbificæ copia ac malignitate, viriumque robore aut dejectione: Ibi subitam ad salutem aut mortem, in melius vel deterius mutationem fieri; & post naturæ morbi que conflictum eas nasci longè evidentissimè conspiciuntur. Vario namque ancipitique Marte res peragitur, nunc antecedentis causæ empyreumate illo à natura probè subactio ac mitigato per eas criticè expulso magnâ ægrorum euphoriâ & symphoriâ; nunc morbificâ materiâ uberiore, contumacior aut maligniore negotium naturæ exhibente, prostratis viribus, ægrorum exitio cuncta tentantur, & vel nul-

læ Aphthæ prodeunt vel mox omnibus inpejus ruentibus, triumphante morbo, summâ animi angustia conduntur atque discedunt. Quam anadromen, quodocunque aut quotiescunque tandem fit, nisi anagoge vel naturæ sponte vel artis auxiliis sequatur pro depositis & conclamatis ægri meritò habentur. Quæ, quæso, evidentiora criseos indicia? Aphtharum materia ab internis ad externas, à nobilibus ad partes ignobiliores trusa bonam ac salutarem constantibus viribus mutationem causatur; contra symptomatico motu ab externis & ignobilioribus ad interna & nobiliora aut in vasa majora regurgitans, opprimendo, & tantum non exstinguendo vitæ fontem, perniciem affert.

Fateor equidem perfectas crises, quæ statim diebus morbos plenissimè solvunt, in his oris quàm rarissimè occurrere, & criseum signa adeo confusa & obscura nobis offerri, ut fere frustra captentur: Nihilo tamen minùs imperfectas, quæ lentè & sensim extirpant quicquid in corpore malorum est, frequentissimè dari constat. Quibus non immerito Aphthæ accensentur: Est enim affectus hic tardior & plerumque longiùs protrahitur, nec in dies tantum, sed in septimanas, nonnunquam menses. Contingit utique sæpissime, maximè si initio morbi universales vacuationes neglectæ fuerint, cum ex per Aphthas



thas commodè post tentari nequeant, eam plethoram & cacochymiam in corpore exundare, quæ non nisi longo tempore per Aphthas, diaphoresin, sudores, urinam & lenia alviduca absumi possit. Nam venæsectioni, quod palmarium ad deplenda vasa præsidium est, aut acriori, iteratave purgationi nullum locum esse post ortas Aphthas, si ex dictis nondum patet, plenius & fusius in earum curatione urgebitur. Adeo ut omnis vasorum colluvies Aphthis potissimum exhaurienda sit. Adhæc antequam periodum legitimè absolverunt, & omne miasma, Aphthis eliminandum sublatum est, variis de causis stationem deserunt & interna repetunt. Hoc casu maximam partem aut in solidum quæ per excretionem, quæ per anadromen evanescunt, adeo ut interius os, quod pridie aut aliquot ante horis undique iis obtectum erat, postridie vel paulo post omnibus liberum & vacuum sit, ægri expeditius deglutiendi & spirandi munia obeant, sibi que restituti videantur. Sed qui debellatus apparet hostis, in insidiis latet, hoc plus metuendus, quò à vitalibus propius absit. Quodcunque istius miasmatis in vasa tunc rediit (ut ex recrudescente febre, cordis oppressione, citato interdum alvi profluvio, aliisque faciliè colligitur) novam ibi materiam, quam sibi obnoxiam faciat, invenit; & fermenti vice in

b

suas

suas partes rapit quicquid sequi promptum paratumque est. Cum quo prælia instaurat, quibus si non fatiscat & concidat, tamen plurimum quantum natura delassatur, & non nisi commodis alimentorum & medicamentorum adminiculis suffulta, denuo se exonerat, novasque Aphthas gignit. Quæ non aliter fere quàm si nullæ unquam fuissent, suum spacium requirunt, quo maturentur & excernantur. Neque id semel, sed interdum sexies, septiesve aut sæpius contingit, ut expulsa Aphtharum causa, vitæ arcem infestis signis petat. Ex quibus videtur esse perspicuum, omnes Aphthas per modum criseos nasci, quæ ex ancipiti & diuturnâ naturæ & morbi luctâ moras trahat, longiores, breviores, ut alteruter fortior pluribus aut paucioribus præliis bellum illud confecerit. Nunc de antecedente & continente Aphtharum causis dicendum est. Antecedentem non ejusdem indolis & moris esse, vel id unum argumento est, quod tanta illius moderatio & benignitas aliquando sit, ut quamvis copia fatiget, edomita tamen & mitigata nihil negotii cordi faceffat: Alias tam ferali rabie grassetur & infestet, ut quascunque partes tetigerit, extrema iis minetur: Si cordi incubuerit, ejus calorem, motum, & quicquid ex eo in universum corpus virium diffunditur, tantum non suffocet: Si in infimum ventrem præceps feratur, symptomatum phalangem



langem invehat, & inter ea perniciosissimam diarrhœam, qua corpori vix succus & viribus fomes relinquitur: Pari modo si mentis sedem invaserit, deliria, vigilias, jactationes, furores, aliaque sævissima infligat, adeo ut hæc tanto imperio, quanto illa obsequio se gerat. Neque aliunde ferme illa empyreumatis diversitas petenda est, quàm à materiæ morbificæ coctione aut cruditate. Per pepasmm enim & coctionem, quæ excessu qualitatis infecta sunt, ad temperiei mediocritatem redeuntur; & quæ orgasmo huc illud palabunda vagantur, in ordinem redeunt; quæque substantiæ modo quodam omnis coctionis expertia sunt, ab utilibus separata convenientibus viis excluduntur: ut quocunque modo ferociam ponant, quæ à naturæ finibus longius recesserunt. Et ut hic quorundam, juniorum imprimis, qui postquam cum sapientia veterum divortium fecêre, ipsis quoque artis vocabulis nuntium misêre, palato inserviat, non intelligimus coctionem illam cæco modo fieri ab nescio qua natura partibusve solidis; sed cum sit fermentatio, mistorum concursu, virtute & efficacia absolvi. Facile enim concipimus plurima heterogenea inter se commissa se infringere, atterere, & luctando omnem asperitatem & feritatem amittere. Novum etiam è corde spirituum accessum semper humores non modo ciere, sti-

mulare & miscere, sed & quadam veluti Majestate omnia moderari. Quamvis difficile sit omnes continenter meatus & ductus prode-  
re, quibus animalis spiritus ad cor & deinceps in sanguinem redeat; tamen de re ipsa dubitandum non esse, satis arguit & structura cordis & ejus nunquam intermissa atque indefessa munia. Ex musculis miro opificio totum contextum non nisi animali spiritu inflatur atque agitur. Deinde singulis pulsibus is ignis in corde accenditur, qui non aliter in effæto sanguine oriri posse videtur, quàm accessione & inflammatione acerrimi cujusdam agentis: quod qui aliud ab animali spiritu comminiscitur, næ ille argutando meras nugas agit. Consentaneum etiam naturæ legibus est, ut quæ cordis anfractus semel transire, si sibi consultum velint, identidem officinam illam repetant; qua à morticino languore vindicentur. Hic animalis spiritus in orbem ad cor regressus & sanguini postliminio redditus ut rei naturalis pepseos & coctionis autor est, ita pepasmm & coctionem rerum alienarum, quæque præter naturam sunt, primariò obit: Ut tanquam naturæ minister atque emissarius eam omnibus formam indat, quæ vel vitæ sustentandæ sint, vel excretioni facilitandæ. Hinc quæ ante septimum morbi diem Aphthæ suboriuntur, multo molestiores & lethaliiores sunt iis, quæ à septimo vel  
nono



nono die proveniunt ; Quod earum materia mitior & mollior tractu temporis evaserit , minusque jam viribus fractis gravis sit , quàm contumacior viribus integris.

Sed quia hætenus aphthas ut continuarum febrium comites vel pedissequas expendimus , antequam antecedens earum causa dimittitur , videndum est an ea semper in febrili miasmate consistat. Memini plurimis adfuisse me qui in summa apurexia aphthis tenerentur ; quique præsensisse nullam febrem , ab omni que graviore malo se immunes fuisse asseverarent. Possè etiam aphthas per se oriri nulla præcedente vel comitante febre haud difficulter inducor , cùm quævis labes à naturâ victa & eò loci criticè expulsa earum materia esse possit. In infantibus certè & nuper editis talis acrimonia ac malignitas , præeuntesque febres non semper observantur. Omnis earum causa & origo in illis videtur deberi materno sanguini & polydædalæ isti impuritati , quam in utero contraxere , quæ levi sæpe ebullitione per sudorem & aphthas fugatur. Inquinamentum tamen febrile , majoribus vasis conceptum , sua , naturæque propensione ad Aphthastendens , plerumque earum antecedens materia & causa est. Quæ ut continens fiat & ad dicta loca feratur nunc videndum est.

Docet usus , vacuationes , quamvis morbis sint pares , tamen eos non solvere , quin etiam

magis irritare , si eorum causa per loca non sibi commoda viam affectet. Ita in variolis , & morbillis , ut & Aphthis stimolata alvus quantum sæpe noceat experimur. Unde ad salutarem excretionem non modo requiritur naturæ inclclinatio & robur , quibus à molestis & alienis rebus liberetur ; sed vel imprimis ut peculiari humorum morbificorum ingenio ac motui ii meatus & viæ pateant , per quas inoffenso cursu ferantur. Hinc in imperfectâ crisi , quæ omne malum non una subitâ mutatione , sed pluribus judicationibus absumitur , optimè monet Hippocrates : quæ ducenda sunt , eò ducenda , quò maximè natura vergit per loca convenientia. Neque hæc Aphtharum continens causa per arterias proximè in os , eique vicinas partes videtur egeri , sed potius per vasa , adulto hoc sæculo detecta , quæ lympham vehunt , & ab inventoribus lymphatica appellata sunt. Illa non tantum limpidissimam & purissimam ad oris , vocalesque partes irrigandas aquam manant ; sed & sæpe vitia , quæ induerunt , in eadem loca deponunt. Quid enim obstat quominus sincerus hic humor ex vasis majoribus admittat & transferat quædam miasmata & sanguinis vitia , cùm tenuitate & fluiditate aptissimum vehiculum sit ? De hoc tamen cum nemine contenderim , quia ad felicem Aphtharum curationem exiguum momentum ac pondus videtur conferre.



Id extra omnem aleam est, plurimum feri Aphthas comitari & ore, totoque capite exuperare. Videre licet sub earum exortum, ægros flammante febris aliquando non solum in somnum pronos, sed profundo etiam sopore inquietari, vellicari, & turbulentiùs evigilare. Quæ simul arguunt feri in capite plethoram & acrimoniam empyreumatis sero junctam, menti, sensibusque vel sepultis gravem.

Postquam internas Aphtharum causas, modumque generationis rudi minerva delineavimus, quo fato septentrionalem plagam potissimum oppugnent, quod in descriptione postremum erat, quærendum videtur.

Dari morbos endemios, qui certis quibusdam locis & populis peculiariter adhærent, nec aliis regionibus temerè conspiciuntur, ab omni ævo observatum est. *Lucretius* libro VI.

*Est elephas morbus qui propter flumina Nili  
Gignitur Ægypto in media neque præterea usquam.*

Atthide tentantur gressus, oculique in Achæis finibus: Inde aliis alius locus est inimicus partibus ac membris, varius concinnat id aër. Alpium accolæ quàm obnoxii sint strumis, bronchocelis, & steatomatis; & Sarmatæ ac Poloni illi plicæ qua capilli veluti glutine inviscantur ac complicantur, notum est. Sed

omnium instar eos arguit Scorbutus noster qui hæc oras perpetua Tyrannide occupat, & hic veluti sepem regni constituit. Aphthas autem nostrates ex eorum censu esse facile mihi consentiet, qui omnia retro sæcula, & quæ diversus à nostro orbis porrigitur, animo relegerit. Prisci artis nostræ Patres in hoc affectu silentio plusquam sacro usi fuere; & qui deinceps insecuti sunt, quique hodie calidioribus terris humanæ saluti consulunt, nusquam earum meminere.

Solo, ut supra dictum est, nomine nobiscum conveniunt, qui, si utrarumque natura spectetur, maximo intervallo dissident. Si rem suis momentis perpenderit, non utique magno labore causas explorabimus: nam qui in his oris humor naturæ vi in Aphthas propendet, easque gignit, ferventiore tractu eum sudor omnem exhaurit. Quippe aër subtilior, corporum habitus rarior, humores tenuiores & fluidiores, omnia denique ad diaphoresin & sudorem comparata sunt; contra apud nos frigidius & humidius cœlum, victus crudior, habitus corporum densior & humores crassiores, reliquaque omnia totidem fere sudoris remoræ sunt. Nec levia aut pauca indicia sunt, quæ probent, nostratium Aphtharum materiam æstuante plagâ critico sudore dissipari. Nam hic copiosior sudor & superiores urinæ Aphthas imprimis tutiores, levioresque efficiunt:



efficiunt: quæ vacuationes si quo modo præpediantur aut subsistant, maxima Aphtharum vis etiam à valido, sed oppresso corde emergit ac continuo succrescit. Materia enim aphthodes sero potissimum miscetur & ob id commodissime vacuatur per vias quibus serum & lymphæ defecatur. Ad hæc nihil in aphthis funestius est illis excretionibus quæ revulsionis lege sudorem remorantur: ut si alvus, uterus, hæmorrhoides, aliæve partes sponte vel temere irritatæ præsentibus aphthis magnam eorum, quæ consuevere, copiam profundant.

Adeo ut nostrates aphthæ suboriantur lentâ crisi, quæque hic æmuletur eam, quæ in naturis, locis, aëre, victu calidioribus sudore aut urinâ peragatur. Est quoquam prodiere tenus si non datur ultra.

Nec omnibus quidem borealibus tractibus ex æquo frequentes ac graves sunt: Singulæ ferè urbes aliter eas experiuntur. Zelandia nostra adeo iis exposita est, ut senescente autumno aut ineunte hyeme decimæ quæque & ultra ex continuis febribus per eas terminentur. Horum omnium endemiorum malorum causas si ex Physicis instituti nostri ratio pateretur transferre, non aliam nunc animo lubentius amplecterer, quam in mundi hujus incunabulis omnia ex iis simplicissimis rerum seminibus (quæ innumerabilia sunt) co-

luisse atque etiam dum constare, quæ firmam & stabilem, nullâque creatâ vi domabilem naturam sortita, multifariam quidem inter se committuntur, dividunturque, neutiquam vero primum substantiæ modum exuunt vel mutant. Quæ primordia ut terram nostram componunt & pro naturæ suæ indole omnia afficiunt, singulas telluris hujus regiones & plagas iis omnibus referciunt, quæ nobis vel amica vel inimica, salutaria vel noxia sunt. Nec subterraneis modò mineralibus alia aliis loca ingruantur, atque imprægnantur; sed summa hinc terra quæ inquinamenta induit, illis aquas, aërem, fruges, fructus, omnemque hominis nutritum spargit: adeo ut inter sacra mensæ, dum genio litatur, cum gulæ illecebris ea admittantur, quæ cuniculos in vitam sensim agant, eamque, mox demoliantur.

Has leges, æternaque fœdera certis imposuit natura locis.

Ut Medicina, naturæ simia, ex combinatione simplicium alia atque alia in usum hominum medicamina præparat; ita ex fœcundissimâ naturæ penu quædam ad salutem & nostri conservationem nobis suppetunt, nonnulla in perniciem simul obrepunt; quod aliena & heterogenea labem suam ubique relinquant: adeo ut ex iis fontibus domestici & vernaculi morbi emergant, quibus vita sustentatur & conservatur.

Ventorum quoque ac cœli, solisque clementia vel ferocia, locorumque situs sua huc pondera conferunt. Cyclades Zelandiæ nostræ, mediis aquis innatantes, cum non nisi vada sint congelto aggere cincta & ambienti pelago vix caput extollentia; cumque Neptuniam hanc prolem ventorum furori objiciant, quid mirum eum hic cœli haustum esse, qui præter uliginosi soli falsedinem, eorum affectuum parens sit, de quibus aliæ gentes nefando quidem inaudiverint? Sed longius digressi in viam redeamus. Dum procatarcticas & externas causas nostratibus aphthis eas assigno, quas in genere omnium endemiorum morborum scaturigines agnosco, non eadem mea ac illorum mens est qui veterum aphthas tradidere: Illi enim, dum ea externa assumuntur, vel alio quovis modo internas oris partes feriunt, acri erosione, aliâque infestâ qualitate proxime volunt parere ea ulcera, quæ ipsis aphthæ vocantur; secus autem, vitia ea ut foris ingruunt, ita aphthas nunquam edunt, nisi prius universum sanguinem affecerint idque negotii solidis partibus creaverint, ut continuæ febres inde plerunque succrescant, quæ peculiari naturæ, humorumque motu in aphthas desinunt. Sed ad signa earum transimus. Diagnostica, quæ præsentem eas indicant, cum oculis obvia sint, & dijudicari vel à mulierculis possint, minus anxiam & sollicitam operam



peram postulant. Ea vero diagnosi, quæ aphthas imminentes & mox erupturas ex artis legibus speculatur, difficilior est, & incertâ augurandi fide fere nititur. Utcunque se habet, præstrinxisse eam, utique fraudi non erit. Instare aphthas docent primo spirandi & deglutiendi labores; æstusque pectoris reciprocantis inordinatior atque immoderatio; vox minus distincta ac clara, lingua etiam, omnisque interni oris compages ab indomita siccitate exasperatur; Somnus nunc turbulentus, nunc profundus, sed à quo non magno adeo opere ægri levantur. Quæ ab urinis in hunc finem indicia petuntur, adeo incerta sunt, ut recenferi non mereantur. Mitissimæ tamen aphthæ post coctionis signa, quæ nobis urinæ exhibent, apparent.

Nec contemnendo etiam argumento colligitur aphthas in procinctu stare, si ægri mala ab iis vacuationibus, quæ alias omnibus minuendis aut tollendis pares erant, adeo nihil remittant, ut magis magisque indies ingravescant. In continentibus febribus, vel tertianis putridis si alvus naturæ sponte vel artis auxiliis proritata magnam vim bilis, ejusque saburræ, quæ præcordia occupare solet, excluderit, si vomitu, urinis aliisve vacuationibus undique ægri rebus prospectum fuerit, & ea tamen vel adest vel insequitur vitalium angustia, præcordiorum oppressio, ac refugien-

te animo virium præcipitatio cum inquietudine, aliâque terrificorum symptomatum phalange, ut ægri depositi videantur; in his reipublicæ humanæ seditionibus ac tumultibus non temere aphthas impendere suspicabitur, quisquis usu cognoverit, unius noctis spacio hæc omnia componi, si solutis repagulis, victisque obicibus naturæ vigore aphthæ proruperint. Quin illud, cum quo collato pede natura concreditur, facile concludet ejus ingenii esse, ut non per regiam viam, sed faucium angustias salutarem fugam capeffat; quo omnia etiam consilia ac operam intendet, ut iis adminiculis, quæ inferius tradentur, in dicta loca hostem eliciat. Ex his signis, utcunque verisimilibus nemo nisi limitando futuras aphthas prædixerit: cum inter hæc nihil aphthodes sæpe lateat ac metuendum sit; & nonnunquam paucissimis horum præmissis magnâ copiâ derepente profiliant. Qui vulgi auram aut etiam vanissimæ gloriolæ chorgium ex hujusmodi præfagiis captant, & se, & artem sæpe sæpius deridendam exponunt. Ut aphthæ propinquæ Medicos identidem fallunt, ita præsentēs non meliori fide agunt, si ex illis salutem vel mortem hariolari velimus. Imprimis enim, ut earum prognosin attingam, incertum & anceps illud malum est. Sæpe cum maximam sui spem ægris ac Medicis fecit, præter omnem expectationem

ad

ad exitium tendit. Cum ratione tamen prognostica quædam pro earum differentia instituantur. Cum aliæ sint infantium, adultorum aliæ, suæ etiam decrepitorum: nunc exhaustis viribus, alias integris aut leviter labefactis superveniant; Interdum mitificatâ & coctâ morbi materiâ, aliquando crudâ & efferâ oriantur: nonnunquam aliquot solum pustulis ab utrâque uvulæ regione summum duntaxat palatum spargant, rursus non tantum universo ori interno, sed etiam interioribus partibus insideant; in tanto discrimine liquere arbitror, longe mitiores, tutioresque esse quæ constantibus viribus, adultâ ætate, post conflictum naturæ & morbi cum signis concoctionis à septimo vel nono morbi die, non ita magnâ copiâ, pacatis plerisque symptomatibus, & imprimis cessante aut multum remittente febre emergunt. Semper graves & tremendæ sunt proVectiori senectæ, ut & effctis viribus. Intuitæ etiam sunt, quæ aliquoties evanescendo repetitis ictibus & insultibus naturæ negotium faceffunt, & non nisi summâ ægri diligentiam ac Medici curâ, ope plerunque medicamentorum laboriosius revocantur. Quâ indole maximam partem illæ sunt, quæ ante subactam morbi materiam proveniunt. Nam ut omnis anadrome materiæ pacatæ ac coctæ vel per se anagogem salutarem habet, ita crudæ &



& ferocientis, vel nullam vel difficilem. Malum etiam si mulieri seu statim, seu intempestivi menses profluxerint: revulsionis enim lege ab eâ sede, quâ solâ cum salute ægri maturescere poterant, in diversam & alienam corporis regionem miasma aphthodes trahunt. Sæpissime vidi etiam in vegetâ ætate cum ab aphthis nihil aut periculi perparum imminere videretur, à solâ mensium eruptione omnia in pejus ruere ac retro sublapsa referri. Eâdem ratione alvus sæpius & copiosius egesta, atque etiam hæmorrhoides hic nocent. Quamcunque corporis regionem aphtharum fomes invaserit, præter eas, quas naturæ ductu atque auspiciis sibi vindicavit, ibi debacchari & extrema minari solet. Catharrus quoque si aphtharum tempore in fauces vel vicinas interiores partes procubuerit, non modo aphthæ dilabuntur, sed nisi vires validæ fuerint, exitialiter latere consueverunt.

Graviores & periculosiores illæ sunt, quæ nullis inter initia morbi vacationibus ministratis, ab impuris, plenisque vasis effunduntur. Quod hic & alibi contingit quam frequentissime: Nam quamdiu vis morbi patitur, sumptibus parcunt & in ipso demum statu ad Medici operam plerunque confugiunt, quo non modo omnia intentata sunt, sed attritæ vires & in aphthas natura propendens, vix quicquam dignum &

par morbo tentari sinunt. Cæterum cum affectus hic sæpè diuturnus & vario fato formidabilis omni ætati ac sexui sit, magno solatio & virium adminiculo appetitus qui fere semper languet, nonnunquam exacuitur. Hoc beneficio, quamvis malum protrahatur, ægri perferendo sunt: cum à novo commodi alimenti succo plus naturæ, quo fulciatur, accedat, quam mora rerum, quæ præter naturam sunt, ei auferat. Quod cum primis videre est, cum

*Placidus fessum, lenisque foves,  
Tuque ô domitor, somne, malorum,  
Pars humanæ melior vitæ.*

Sed ad curationem velis remisque properamus. Ea in hisce potissimum duobus consistit: Aphthæ in ore conspicuæ, lenientibus stomaticis maturandæ sunt, & vasorum residuus ille æstus febrilis, qui quam rarissime per aphthas universus simul & semel crititè expellitur, temperandus, omnibusque modis minuendus atque absumendus est. Prius autem quam hæc persequar, quærere lubet quid statuendum sit de venæsectione & purgatione, communissimis atque efficacissimis ad deplenda, mundandaque vasa auxiliis. Quod sanguinis educationem, postquam aphthæ prodierunt, attinet, scio eam variis locis à quibusdam temere

mere administrari, nulla aphtharum ratione habitâ, modo suppressa aliqua vacuatio, aut plena, turgentiaque vasa eum detrahendum, vel ebulliens effervescentia refrigerandum suadeant. Sed cum ea per aphthas naturæ studio ac motui adversetur, cumque victum, fugatumque hostem in penetralia reducat, & ea subsidia queis bellum hoc natura feliciter conficere solet subducat, ægrosque ad eâ fœde mactari sæpissimè visum sit, nullum locum conspectis aphthis sanguinis missioni relinquimus, nisi forte alius quis affectus, qui magis urgeat, iisdem jungatur. Vidimus in virgine viginti trium annorum, cui inordinati ac parciore mensis erant, verâ pleuritidè aphthas comitatas. Cum sinistri lateris acerri-mus ac pungens dolor, dyspnœa, tussis, ardentissima febris, aliaque mala præsens remedium exposcerent, non dubitavi satis largâ copiâ sanguinem educere; & cum nec hoc auxilio, nec juleporum ac topicorum convenientium usu ulla sanguinolenta vel purulenta sputa prodirent, nec quicquam eorum, quæ jugulare ægram videbantur, vel hilum remitteret, medicamentum, quod placando dolori ac sudori studeret, exhibui: à quo (mirum visu audituque) quæ sinistro lateri ac pleuræ impacta morbi materia fuerat, niger-rima ac foetidissima per alvum omnis excernebatur & evanescentibus funestis illis symp-



tomatis sola animi deliquia ab eâ diarrhæâ orata cum aphthis perseveravere, quæ invigente ætate victu ac medicamentis roborantibus edomita pristinae salutis ægram restituere. Eandem venesectionem meminisse in nauta meo jussu factam, quem post aphthas phrenitis, aliaque horrenda mala tenebant, eâque adeo levatus fuit ut vel uni huic salutem suam debuerit. Hæc tamen non incaute tendenda ac æmulanda sunt, & (ut dixi) nisi alia aphthis graviora omnem medici curam atque operam in se convertant: plura enim & majora ab anticipiti hoc præsidio metuenda quam speranda sunt. Omnem igitur præsentibus aphthis incisionem venæ huc usque damnamus atque proscribimus, quamvis ex ægri rebus ante earum exortum non modò obiri posse sed quam sæpissime debere contendamus.

Nihil enim aphthas tam lenes ac tutas præstat quam si suo tempore universales vacuationes præcesserint, naturamque sub impuro onere ingemiscentem aliquo fasce levaverint. Eadem rationes, quæ venesectionem efflorescentibus aphthis dissuadent, etiam contra purgationem eam militant, quæ cacochymia propria atque accommodata ab universo corpore & ulterioribus viis noxios quosque humores trahit. Ea hic funestissima est & intra paucas horas hypercatharsi finem vitæ plerumque facit. Alia est purgatio improprie ita dicta,

dicta quæ crassiorum intestinorum aut etiam, primæ regionis fœces subducit, & non nisi consecutione quadam ulterius extenditur, quæque non tam epoto quàm injecto medicamento obitur. Ea præclaram per aphthas operam sæpè prestat; & intestina eluendo, alvumque remorantem proleſtando non tantum infimi ventris vitia mitigat aut compescit, sed etiam ab oppressione per eam vindicata natura alias evacuationes, per urinas, sudores, atque ipsas etiam aphthas feliciùs molitur. Tamen & hic circumſpectione opus est, nec nisi tertium jam diem aut etiam ultra segnescente alvo commodè tentatur. Lenientes ac emollientes clysteres, si facultates ægri id præsidii genus patiantur, præ aliis omnibus probantur; sin minus, glandes. Quæ ore assumuntur medicamenta alviduca, vel alimentosa sunt, & hebitiora ac ignaviora ferè frustra ad duriores fœces accedunt, vel validiora subsistentem quidem alvum agitant, verum diarrhææ metum injiciunt. Si quando imtempestivo ac præpostero purgantium usu aut sue ipsius sponte converso motu peccans humor in ventrem illabatur, dissipates atque evanescentibus aphthis accensâ feбри, deliquia, singultis atque exitialis illa hypercatharsis invehuntur. Nec ea componuntur nisi omni ope præceps alvus sistatur & aphthæ postliminiò redeant. Quæ omnia, ut felicissimè & ex ægri ac Medici vo-

to res cadat, imminutis tamen viribus & temporis dispendio fiunt. Caveat igitur junior Medicus, sibi que ac ægro temperet, ne hunc hostem exhibitis temerè cathartici laceffat: nam galeatum serò duelli pœnitet. Quod quidam, imprimis pueruli, negligentius ac vilius habiti, totos quandoque dies ac noctes in aphthis summâ animi alacritate ac vigore dejiciant (quod & in variolis aliquoties vidi) ea non tam exempla quàm monstra sunt. Postquam ex usu quotidiano prodidimus, quomodò utrumque illud potentissimum ac frequentissimum alexicacum, venæsectio ac purgatio, in aphthis moderandum, ad reliqua progedimur. Aphthæ, ut supra dictum est, vel crudâ atque etiamnum turgente morbi materiâ, durantibus ebullitione & sanguinis in majoribus vasis effervescentiâ, febre, aliisque cognatis malis ante aut post septimum morbi diem oriuntur; vel à septimo die, subjugatâ ac probe concoctâ omni malorum materiâ, discessione utilium factâ, à robustâ naturâ in locis convenientibus gignuntur. In his præter commodam diætam & pauca quædam stomatica nullus usus medicamentorum est. Quid enim victricem & triumphantem naturam, erectis in ore tam illustribus tropæis, rebus his ingratis non aliter quam si medio adhuc campo hoste committeretur aut in acie stare, interpellare ac turbare juvet? optimum  
hic



hic remedium est nullo uti remedio. Quamvis non ita frequenter, tamen fieri videmus, ut cum aphtharum ortu reliqua mala, quæ Medici curam sollicitant, oblitentur atque aboleantur, & omnis in solo ore ac faucibus labor consistat. Hoc in casu quibus os & ori vicina colluenda sint, quibus gargarizandum, quæ stomatica subsidia apellantur, quia in eo cardo rei vertitur, diligentius est limitandum. Utuntur hodie practici, iique haud obscuri nominis, refrigerantibus atque astringentibus, seu actu, seu (uti vocant) potestate talia fuerint. Sed quo fato ipsi viderint. Hoc constat, quantum ori ac faucibus per frigida illa spacii ac laxitatis, tantum cordi & vitalibus angustia, anxietatisque parari. Tantum possunt præjudicia, ubi animos semel invasere; nec cœcitatem modò inducunt, sed & videndi desiderium adimunt. Priscorum aphthæ, cum erodentia ac serpentia ulcera fuerint, refrigerantium ac hujusmodi astringentium opem postulaverunt; sed alia longe nostratium ratio est, quæ quo magis proliciuntur, hoc mitiores sunt, & tùm demùm ferociam suam in graves tumultus acuunt, cum exitu prohibentur. Male utique juvandi artem profitetur, qui cum natura, quam tuendam suscepit, digladiatur, & ab externis ad interna malum traducit, ablatum ratus quicquid extra sensuum ambitum est. Alterutrum repellendo fieri ne-

cesse : vel ut ardor aphthodes , præpeditus ,  
 instauratis præliis , avalidâ naturâ ægrè vin-  
 catur , vel debilem obruat. Iis igitur , qui-  
 bus os colluitur , aphthæ non fugandæ , sed  
 provocandæ sunt. Quæ non alia sunt quàm  
 lenientia , maturantia , dulcia , pectori ami-  
 ca , omnia formâ liquidâ & actute pida. Plebs  
 nostra usu & Medicorum præceptis edocta ,  
 posthabitis omnibus operosioribus & sumptuo-  
 sioribus medicamentis tutissimè utitur vel solo  
 raporum juscule saccharo edulcorato , vel si  
 tempestas anni id negat , solâ cerevisia tenui  
 saccharatâ. Quæ duo , ubi intepuerunt , om-  
 nes oris partes alluendo , & in imas fauces de-  
 scendendo non modo aphtharum acrimoniam ,  
 si quæ sit , placant ; sed omnem etiam quali-  
 tatis excessum mitigant atque hoc pacto ma-  
 turationem perficiunt. Quanquam illa hoc  
 magis probanda sunt , quod nobis familiaria ,  
 alienam ac ingratam medicaminis vim non re-  
 sistant ; tamen in eum finem plurima alia præ-  
 scribi possunt. Ut rei medicæ ignaris grati-  
 ficemur , formulam gargarismatis , quod do-  
 mesticum & quovis tempore omnibus parabi-  
 le est , adjungam & hordei mundati ℥j passu-  
 larum exacinarum ℥ij ficus n° iij liquiritiæ  
 rasæ ℥iij coque ex aq. communi ad ℥ij in co-  
 latura solve syr : injubini ℥ij. misce. Si procul  
 ab urbibus ruri degitur , loco illius syrupi ,  
 vulgari saccharo colatura dulcescat , & pala-  
 to

to concilietur. Hujusmodi collutione oris identidem utendum est ut obsessæ atque aridæ fauces id jubent. His subjugunt multi varios linctus, quorum quamvis nullos nisi refrigerantes ac repellentes improbem; tamen quia omnes syrupi ventriculi tenorem solvunt & flacciditatem ei inducunt, ad hæc plurimo muco constipant, nauseamque & cibi fastidia augeant, omitti salvis ægri rebus possunt. Si quis tamen eos concupiscat ex omnibus jujubinus, tussilaginis, capellorum veneris, de liquiritia optimè eliguntur. Eâ cautione ut inter initia exortus aphtharum temperati, in progressu & fine calidiores præferantur. Jam denique dispiciendum est quomodo in imperfectâ ac lentâ crisi, quæ frequentissima est, aphthæ regendæ sint. Si omnis vasorum majorum æstus non cum aphthis deferbuerit, sed turgescendo pro suo, partiumque quas occupavit ingenio tumultuetur, caute tractandus est, ne feræ sævientis more stragem edat. Nec ad hoc magnâ vi semper opus est: blandiendo & palpando ferocissima quæque mansuescunt: peragit tranquilla potestas quod violenta nequit. Sape commoda victus ratio palmam hic præripit ei medendi modo, quo plurimis & variis medicamentorum formis ægri delassantur. In victu conveniunt omnia corroborantia & quæ citra offensam pectoris refrigerando humorum fervorem temperant,



nec non urinam & sudorem cient. Ille puer-  
perarum potus ex vino rhenano, ovis, cina-  
momo, saccharo & croco confectus sæpe om-  
nibus intentionibus solus satisfacit, & nisi  
calidior sitim, siccitatemque adaugeret, om-  
nium, quæ promovendis aphthis sunt, mag-  
num instar foret. Nunc gallinarum, carnis  
vitulinæ, aut vervecinæ, nisi alvus laxior sit,  
jus paucò croco aut corucervino præparato  
conditum optimè naturam adversus hostem in-  
struit. Si res tenuiores hos sumptus non fe-  
rant, ova sorbilia cum croco aut dicto cor-  
nucervi præparato sumpta idem fere præstant.  
Lac etiam vaccinum cum hordei farina in pul-  
tem actum ad conciliandum somnum in no-  
ctem sumitur. Placentam apud nos ex lacte,  
saccharo & ovis in formam paulo solidiorem  
lento igne coquunt. Cui aliquem etiam hic  
locum damus, si fauces liberiores sint deglu-  
tiendo. Hoc fere modo possunt plurima pro  
cujusque genio ex victu quotidiano proponi.  
Sed fugienda semper in hoc affectu acida. Quæ  
licet putredini potentissime adversentur, &  
languentem ventriculum stimulent, plerisque  
etiam gratiora sint, quia tamen pectoris ingra-  
tiis invitisque pulmonibus usurpantur, ne tussim  
aphthis infestissimam pariant, releganda sunt.  
Pro potu, quibus res angusta domi est, utun-  
tur suo raporum juscule aut cerevisiâ dulco-  
ratis: ditioribus varii julepi præscribuntur, ne

eo compendio sanitas vilescat. In rudiorum gratiam hæc formula sit ꝛ hordei perlati ꝓvj fol: & flor: borag: bugloss: ā m iꝥ cinamom: ꝓi liquiritiæ ꝓiꝥ coque ex aq. coi ad tꝥ iꝥ in colatura macerentur bihorium calide conf: borag: violar: ā ꝓj. factâ per manicam hippocratis colaturâ & additis sp: sulphur: gutt: XIV. f. potus clarus. Si vero majori humorum ebullitioni & savioribus symptomatis hæc hæctenus præscripta imparia fuerint, ad medicamenta generosiora ac potentiora confugiendum est. In contumacioribus vigiliis vel somnis emulsiones ex seminibus frigidis, leniora etiam narcotica, si virium robur adsit, conveniunt. Variæ etiam potiones adversus febrilem æstum componuntur ex lapide bezoardico, cornucervino, salibus Carduibenedicti, absinthii, oculis cancri, tartaro vitriolato cum syrupis violar, papau; rhæados & stillatiis aquis calendul. carduib. quæ hic celebratur gelatina cornucervi, ex re & summo usu est. Si vero hisce cardiacis & febrifugis indurata alvus constipetur, tertio quoque die (uti dictum) clystere vel glande sollicitanda est. Id enim in omnibus morbis, imprimis acutioribus contingit, ut licet crassæ & indomitæ ciborum reliquiæ in intestinis nulla colligantur, quia nihil aut parum earum rerum assumitur, tamen à majoribus vasis semper quædam in alvum deponuntur, quæ alendo corpori inido-

nea sunt & ob crassitiem per alias vias excerni nequeunt. Ne igitur hæc in imo ventre cumulata, longiori morâ hypochondriis, naturæque molesta sint, tempestive provocanda sunt. Hac solâ cautione ne inquinamentum aphthodes introrsum deorsumque proriteatur.

Si autem sponte vel præpostero assumptorum aut injectorum usu ad intestina ruat, & ea acri morfu vellicando ad pestiferam diarrhæam instiget, hoc casu non clysterum blandimentis acrimonia intestinorum eluenda est, ut alias in dejectionibus biliosis & fervidis frugifere sit; sed unâ eâdemque operâ effrænis alvus cohibenda, & perversus humorum motus corrigendus est. Cui inserviunt enumerata paulo ante simplicia, sudorem simul elicientia & alvum compescentia si in potionem hujusmodi formentur: R magister coralorum, cornucervi præparati à ℥j theriac: ʒss croci gr. viij. syr: papau: albi, si ætas & vires ægri sinunt, ʒss aq. carnuib. q. s. misce f. brevis potio, pro ætate adultâ. Vel talis R decocti card. b. aut scordii, aut meliss: fl. calendul. cinam: omnium q. s. ʒiij adde salis card. b. oculor; cancri, tartari vitriol, si ingens æstus sit, ana ℥j syr: de rosis siccis aut corallor: ʒss misce. Atque hoc modo innumeræ potionum formulæ ex prædictis conflandæ sunt. Quæ quidem omnes id potissimum agunt



agunt dictâ victus ratione adjunctâ, ut aphtharum materiam cœco furore in interiora atque inferiora pronam verso itinere ad superiora & exteriora repellant. Quæ res vel sola salutare ac tutissimas aphthas facit.

Sunt enim illæ alicujus malignitatis participes, præcipue in adultis & ardentibus febribus. Hujus ratione omnem fere Medici curam ad se trahunt, atque alias omnes vacationes, cœteraque auxilia pro earum arbitratu ac imperio fieri par est. Quippe prima ac summa malignitatis ratio est, quod ea ipsi vitæ fonti insidietur atque hyperbolica substantiæ hyperbasi subitam atque inexpectatam plerumque cladem edat. Quam explicare ut hic locus non patitur, ita aphthas eâ non carere plurima docent, & ante omnia acerrimus ille cordis conflictus, totiusque humanæ œconomix tumultus, ubi qui fusus, fugatusque videbatur, aphtharum æstus denuo ad credit. Hoc igitur præ cæteris agendum, ut ab eâ malignitate. Vitalia vindicentur & facta rectaque maneant. Quia vero aphthæ nunquam fere ita maturescunt quin vario insultu, iterum iterumque cor laceessant, viribus semper consulendum est, ut repititis maliciis pares sint. Quod non ægre fiet, cum omnia quæ aphthis eadem & viribus dicata sint. Præscriptæ potiones ætati, viribus, malorumque favitiæ prudenter accommodandæ sunt,

nec

nec crebriores esse debent, quod citra virium  
jacturam non sumuntur. Insaurens victus se-  
curitati conjunctam magnam efficaciam sem-  
per habet. His observationes quasdam sub-  
jungerem nisi aliorum de hujus mali naturâ ac  
cura mentem audire satiùs putarem.

F I N I S.



## ERRATA.

Pag. 194. *lin. 13. post inflammationes adde Erysipelatodes. Ibid. lin. 20. post aut adde pedis totius, prolapsus brachii aut.* Pag. 195. *lin. 17. sani lege sunt.* Pag. 198. *lin. 21. post modò adde rubræ, modò.* Pag. 206. *l. 28. post malum adde ovum.* Pag. 207. *lin. 26. adde post tanquam, sibi propriam arri puerunt, & Medici,*













